

24. maj 2020

UPA 2020/23

**Inatsisartut inatsisissanik nalilersuisarfiannit tusarniaanermut akissutit pillugit inatsisilerinikkut allagaqaat kiisalu inatsimmut siunnersuutip ilusilersornera**

Rigsadvokatip oqaaseqaatai siunnersuummi ilaannakortumik ilanngunneqarsimasut Inatsisissamik nalilersuisarfimmit paasineqarpoq.

Ilaatigut § 31 pillugu Rigsadvokati allappoq imminut illersorniarnermut tunngasortaa peertariaqartoq *"tassami nalinginnaasumik isumaqartoqarmat uumasooq saassussinaviannigitoq, soorlu tamatuma pinerluttulerinermik inatsisini atorneqarneratut (takuuk pinerluttulerinermi inatsimmi § 9)."*

Apeqquummut 1119-imut 10. oktober 2017-imi Avatangiisinut Inuusutissanullu Ministereqarfimmit akissummi Inatsisinik Atuutsitsinermut Ministereqarfiup paasissutissiissutigaa *"Uumasuutip amaqqumit saassunneqarnera imaluunniit saassunneqaraluttuarnera pissutsit apeqqutaatillugit pillaasarnermut inatsimmi imminut illersorniarneq pillugu malittarisassanut ilaatinneqassaaq. Inatsit malillugu imminut illersorneq pineqarnersoq suliami pissutsit tamarmiusut pillugit eqqartuussiviup aalajangersimasumik naliliinera pisuni ataasiakkaani apeqqutaajuassaaq."*

*"Imminut illersorniarneq"* qaqugukkut atorneqarsinnaanersoq Rigsadvokatimit Inatsisinillu Atuutsitsinermut Ministereqarfimmit assigiinngitsumik isumaqarfigineqartoq Inatsisissamik nalilersuisarfiup paasivaa. Taamaattumillu suliami aalajangersimasumi eqqartuussivik naliliisariaqassaaq.

Kiisalu Rigsadvokati ima allappoq: *"Rigsadvokatip uparuarniarpaa § 42-mi tunngavigineqartoq pisariaqassappat pigiinnerneqartariaqartoq, taamaattoqarniarpallu peqatigitillugu nassuiaatigineqartuni sukumiinerusumik nassuiarneqassasoq piumasaqaatit qanoq ittut naammassineqartarsimassanersut suliap aalajangersimasup allaffissornikkut akiliisitsissutitut "nuunnginnerani".*

*Taamaattoqassappallu § 42-mut tunngaviliinermi toqqaannartumik atuarneqarsinnaasariaqassasoq unnerluussummi imaritinneqartussanut piumasaqaatit pillugit eqqartuussisarnermik inatsimmi malittarisassani unnerluunneqartup oqaaseqarnissaminik pisussaaffeqarnera akiliisitsissummi assinganik atorneqassannigitoq, takuuk inatsimmi pitsaassutsit pillugit Justitsministeeriaqarfiup ilitsersuutaani immikkoortoq 4.5.1."*

Siunnersuummi § 43 Kalaallit Nunaanni eqqartuussisarnermi inatsimmi § 347-mut innersuussivoq. § 347-mi allassimavoq pasisaq oqaaseqarnissaminut

pisussaaffeqanngitsaq.

Akerlianilli § 42-mi tunngavissiinermi erseqqissumik allassimanngilaq unnerluussissutip imarisassaanut piumasaqaatit pillugit eqqartuussisarnermi inatsimmi maleruagassat akileeqqusissuteqarnermi aamma atuuttuunersut.

Tassunga atatillugu Inatsimmik nalilersuisarfiup immikkoortoq 5.3.2.7 Namminersorlutik Oqartussat inatsisitigut maleruqqusaani allaffissornikkut akileeqqusissuteqartarnermi ima allaqqasoq innersuussutigissavaa: "Taamatut akileeqqusisoqartassatillugu eqqartuussisoqarnermi inatsisip maleruqqussutaani unnerluussinerup imarisassaanut piumasaqaatit pillugit aammalu unnerluusaaq oqaaseqarsinnaatitaanngitsaq pillugit assingusumik akileeqqusissuteqarnermi atornerqartassasoq tunngavissami ilaatigut allaqqasariaqaraluarpoq."

Qulaani allassimasut tunngavigalugit § 42-mut allannguutissatut siunnersuummik saqqummiusseqqullugit Inatsimmik nalilersuisarfik inassuteqaateqarpoq, tassani ilanngunneqassalluni "unnerluussutip imarisassanut piumasaqaatit pillugit eqqartuussisarnermi inatsimmi maleruagassat akileeqqusissutinut aamma atuupput".

Inatsimmik nalilersuisarfiup paasivaa inatsimmut siunnersuut § 38 imm. 1 nr. 2 eqqarsaatigalugu akiligassiisummik nassataqarsinnaasoq, "§ 33-37 *kingorna peqqusummik naapertuutsitsinissamik pinngitsoortitsineq.*"

§ 33-mi katillugu immikkoortut tallimaniit taamaallaat siulliit pingasut utaqqiisaasumik peqqussuteqarnernut tunngassuteqarput.

Taamaattumik Inatsimmik nalilersuisarfik peqqusisoq § 38-mi, imm. 1 nr. 2-mi erseqqissarneqassasoq § 33 taamaallaat § 33, imm. 1-3 akiliisitsissuteqarnermik kinguneqarsinnaasut peqqusummik unioqqutitsisimanermik nalunaartoqarsimatillugu.

§ 38, imm. 1, nr. 2-mi § 36-mut innersuussisoqartillugu nakkutilliisutut oqartussat suliffeqarfinnik, angallatinik, ingerlassutinik namminerlu pigisanik nakkutilliartornissamut itigartinneqarpata akiligassinneqarsinnaanermik paasineqassaaq, takuuk qulaani aalajangersagaq oqaatigineqartoq. Taamaattorli Nakkutilliisutut oqartussanik itigartitsineq naalakkiiisutinik malinninnginnermut assingualaanngilaq. Taamaattumik § 36-mut innersuussutigineqartumut tunngatillugu § 38, imm. 1, nr. 2 allatut oqaasertalerneqarnissaa pisariaqartinneqarpoq.

Tamatuma saniatigut Inatsisinik nalilersuisarfiup siunnersuutigaa inatsimmi nalunaarutinilu aalajangersakkanik akiligassiisuteqarfiusinnaasunik unioqqutitsinerit tamarmik, inatsimmi tunngavissaqartut, allaffissornikkut akiligassiisoqarnissaanik aalajangiinissamut naleqqunnersut eqqarsaatigineqassasoq.